

September 1 – Un fecha historico

ORANJESTAD- Awe henter mundo lo recorda cu 75 aña pasa Alemania a invadi Polonia pa cuminsa di dos guerra mundial. Hopi programa na television y radio lo wordo dedica na e fecha ey y lo pasa documentario riba diferente bataya di e guerra.

pa: **Clyde Harnis**

Columnista cu no a nace te despues di e guerra tambe lo dedica hopi atencion riba e topiconan aki y lo analisa de-

tayadamente e guerra den tur su facetanan.

Cu apenas ocho aña di edad, mi no ta corda casi nada di dia 1 di september 1939, pero mi ta corda manera dia di ayera loke a pasa exactamente 30 aña despues. Dia 1 di september 1969 Moamar Gaddafi lider di un revolucion exitoso pa converti e reino Libio den un estado comunista Islámico. Ami tabata presente na Tripoli y mi kier a comparti mi recuerdonan di e revolucion cu mi lectornan.

Den oranan tempran mi a wordo lanta cu batimento na mi porta di cas. Mi bisina, president di Phillips Oil Co., a bin avisa mi cu tabatin un golpi di estado; pa mi adverti mi empleadonan pa no bay den stad y pa nan evita tur confrontacion cu e miembronan di ehercito. Mi a pensa cu e golpistanan a ehecuta nan plan oportuno, pasobra Rey Idris tabata na Grecia pa tratamiento medico.

Peliger

Mi prome obligacion tabata

pa adverti mi hendenan. Ma subi mi MGB y uzando e poder tremendo di e auto mi a bay full speed cas di cada un di mi diesdos empleadonan expat. Varios di nan no a lanta for di soño ainda. Ora mi a caba, mi a haci algo cu facilmente por a costa mi bida. Mi a coy rumbo pa mi oficina cu tabata keda den center di Tripoli, menos di dos cuadro di e palacio real y separa di e embahada Mericano pa djis un caya smal.

Ora mi a yega aya tabatin un cantidad grandi di solda celebrando cu tiro den laira cu nan metrayador y rifle. Ora mi a haci un intento di dreña mi oficina un di nan a indica mi den un forma menasante cu mi no tabata permiti. Esaki tabata suficiente pa mi haci un buelta completo y bolbe bek cas.

Tres aña pasa cu Gaddafi a muri manera un animal mi a prepara un analisis superficial di e revolucion den un articulo cu a wordo publica den varios corant local. Permitti mi repasa e puntonan principal.

Gaddafi a lanta contra Rey Idris como vengansa pa e posicion neutral cu e rey a tuma durante e guerra di Juni 1967. Tambe, pesar cu Libia tabatin mas di 10 aña ta disfruta e entrada enorme di petroleo, Libia tabata un pais atrasa. Hopi caya tabata den mal condicion, ainda tabata recoge sushi di cas cu garoshi hala pa burico, pero e famianan di Rey Idris, specialmente e yiu conoci como e Prins Preto, tabata biba na grandi. Gaddafi y su grupo tabata muestra un idealismo di hiba Libia dilanti den un forma democratico bou leynan Islamico. Gaddafi

a priminti di trece un cambio drastico pa nan bienestar.

Mehoracion

Na cuminsamento gobierno di Gaddafi a haci hopi pa mehora e condicion economico y social di e Libionan. El a laga traha hopi cas y el a mehora infraestructura di e pais. E tabata un admirado ferviente di Gamal Abdel Nasser, Josip Broz 'Tito' y Fidel Castro kendenan tabata lider di e movimiento di e paisnan no alinia den e guerra frio. Gaddafi tabata anhele di tambe hunga un rol riba un nivel mundial. El a cuminsa financia e teroristanan Sinn Fein y a permiti nan traha campo di entrenamiento den desertonan di Libia. Ami mes a mira hopi di e Irlandesnan personalmente den un hotel na Tripoli prome cu nan a sigui pa nan campo.

Gaddafi a goberna Libia den un forma dictatorial y cu e rikesa cu Libia tabata genera cu su petroleo, el a cumpra arma, yuda revolucionarionan caminda e tabata por, y hasta participa den actonan terorista manera e tumbamento di e avion na Lockerbie. Y cu tempo a sali na cla cu en bes di biba manera un simpel socialista, Gaddafi y su famia tabata derocha placa di su pueblo hibando un bida di luho y e tabata te hasta mantene un harem di esclavo di sex.

Gaddafi su revolucion tabata un fracaso desastroso pa Gaddafi personalmente y pa Libia. Luga di hiba su pueblo padilanti, manera el a priminti, el a laga su pais y su pueblo den caos y luga di muri manera un heroe, el a muri manera un animal cobarde. □